



IROMAG

Odlazni studenti



47. GODIŠNJICA

Univerziteta "Džemal Bijedić" u Mostaru

by IROUNMO

U OVOM BROJU

**GODIŠNJICA
UNIVERZITETA**

SJEĆANJE NA LIK I DJELO

**SVEČANO OTVARADNJE
SPORTSKE DVORANE
"SPORT I ZDRAVLJE"**

**SVEČANA SJEDNICA
SENATA**

**PROMOCIJA DOKTORA
NAUKA**

**SVEČANA PROMOCIJA I
DODJELA DIPLOMA**



47. GODIŠNJICA

Univerziteta "Džemal Bijedić" u Mostaru

Ponedjeljak, 12. februar 2024.

11:00 Sjećanje na lik i djelo Džemala Bijedića
i Midhada Hujdura Hujke
Ekonomski fakultet, amfiteatar 2

12:00 Polaganje cvijeća na spomen-bistu Džemala Bijedića
i spomen-ploču Midhada Hujdura Hujke i saboraca
Plato ispred rektorata Univerziteta "Džemal Bijedić" u Mostaru

12:15 Catering
Hol Ekonomskog fakulteta

Utorak, 13. februar 2024.

10:30 Zvanično otvaranje Sportske dvorane "Sport i zdravlje"
Nastavnički fakultet

11:00 Turnir u stolnom tenisu
Nastavnički fakultet, Sportska dvorana "Sport i zdravlje"

Srijeda, 14. februar 2024.

12:00 Svečana sjednica Senata
Univerziteta "Džemal Bijedić" u Mostaru
Centar za kulturu Mostar

Četvrtak, 15. februar 2024.

11:00 Promocija izdavačke djelatnosti
Pravni fakultet, sala za simulovano suđenje

13:00 Promocija naučno-istraživačkih i međunarodnih projekata
Pravni fakultet, sala za simulovano suđenje

Petak, 16. februar 2024.

11:00 Promocija doktora nauka
Fakultet humanističkih nauka, amfiteatar

Subota, 17. februar 2024.

11:00 Svečana promocija i dodjela diploma
Sportska dvorana Sjeverni logor

47. GODIŠNJICA UNIVERZITETA „DŽEMAL BIJEDIĆ” U MOSTARU

By IROUNMO

Program obilježavanja 47. godišnjice Univerziteta „Džemal Bijedić” u Mostaru bio je upriličen u periodu od 12. do 17. februara 2024. godine, te je tim povodom pripremljen kvalitetan i raznovrstan program. Prva u nizu aktivnosti održana je u ponedjeljak, 12. februar, posvećena sjećanju na historijske ličnosti i velikane, Džemala Bijedića i Midhada Hujdura Hujku. S obzirom da Univerzitet nosi naziv po Džemalu Bijediću, a smješten je u Univerzitetskom sportsko-rekreacionom centru „Midhad Hujdur Hujka” navedenim aktivnostima Univerzitet „Džemal Bijedić” u Mostaru odao je počast i prisjetio se značajnih ličnosti i njihove uloge u historiji Bosne i Hercegovine.

U utorak, 13. februara 2024. godine bilo je upriličeno svečano i službeno otvaranje Sportske dvorane „Sport i zdravlje” na Univerzitetu „Džemal Bijedić” u Mostaru, a povodom otvaranja dvorane u saradnji sa Unijom studenata održan je turnir u stolnom tenisu.

Svečana sjednica Senata Univerziteta „Džemal Bijedić” u Mostaru održana je u Centru za kulturu Mostar, 14. februara 2024. godine. Tim povodom Univerzitet je ugostio brojne zvanice iz akademskog i društveno-političkog života, a u okviru Svečane sjednice rektorica Univerziteta „Džemal Bijedić” u Mostaru prof. dr. Alena Huseinbegović dobitnicima je uručila rektorove nagrade i priznanja Univerziteta.

Promocija izdavačke djelatnosti, te naučno-istraživačkih i međunarodnih projekata održani su u četvrtak, 15. februara, dok je petak bio predviđen za promociju doktora nauka Univerziteta „Džemal Bijedić” u Mostaru.

Kao finalna aktivnost kojom se zaključio program obilježavanja 47. godišnjice Univerziteta bila je Svečana promocija i dodjela diploma koja je održana u subotu, 17. februara u Sportskoj dvorani Sjeverni logor.

SJEĆANJE NA LIK I DJELO DŽEMALA BIJEDIĆA I MIDHADA HUJDURA HUKJE

By IROUNMO

Sjećanjem na lik i djelo Džemala Bijedića i Midhada Hujdura Hujke uz projekciju filma „Heroj oslobodilačkog rata – Midhad Hujdur Hujka“ autora Seada Kreševljakovića, započeo je program svečanog obilježavanja 47. godišnjice Univerziteta „Džemal Bijedić“ u Mostaru.



„Današnji dan je pored sjećanja na lik i djelo Džemala Bijedića, po kojem je naš Univerzitet dobio ime koje ponosno nosi, posebno posvećeno sjećanju na lik i djelo dobitnika Zlatnog ljiljana i nositelja Ordena oslobodilačkoga rata Midhada Hujdura Hujke koji je bio simbol poštenja, hrabrosti i odbrane ne samo ovog dijela na kojem se univerzitetski kampus nalazi nego i Mostara i domovine“ kazala je rektorica Univerziteta prof. dr. Alena Huseinbegović.

Prije početka projekcije filma, rektorica je istakla da je Univerzitet pokrenuo proceduru izmjene naziva adrese Univerziteta. „Univerzitet „Džemal Bijedić“ u Mostaru će u narednom periodu dobiti svoju novu adresu koja je i predviđena statutom Univerziteta, a to je Univerzitetski sportsko-rekreacioni centar Midhad Hujdur Hujka“ kazala je rektorica prof. dr. Alena Huseinbegović.

Nakon projekcije filma, delegacije su položile cvijeće na spomen-bistu Džemala Bijedića i spomen-ploču Midhada Hujdura Hujke i saboraca, odajući na taj način počast historijskim velikanima i posebno značajnim ličnostima za Grad Mostar i Bosnu i Hercegovinu



By IROUNMO

SVEČANO OTVARADNJE SPORTSKE DVORANE “SPORT I ZDRAVLJE”

Uz prisustvo velikog broja gostiju održana je svečanost povodom otvaranja rekonstruisane Sportske dvorane "Sport i zdravlje" na Nastavničkom fakultetu Univerziteta "Džemal Bijedić" u Mostaru. Dvorana je opremljena po najvišim standardima, a izgradnju i opremanje osim Nastavničkog fakulteta i Univerziteta "Džemal Bijedić" u Mostaru pomogli su i Ministarstvo civilnih poslova Bosne i Hercegovine, Federalno ministarstvo kulture i sporta, Vlada HNK-a i Grad Mostar. Dvorana je prema riječima dekana prof. dr. Ekrema Čolakhodžića samo jedan u nizu koraka pri realizaciji vizije ove ustanove. Studenti će sada imati mnogo bolje uslove za rad, a novootvoreni objekat je zamišljen da bude i mjesto okupljanja i vannastavnih aktivnosti studenata. "Sretni smo što smo projekat doveli do kraja, a još sretniji što na njemu nećemo stati, već nastaviti i dalje ulagati u infrastrukturu, te tako studentima i nastavnom osoblju omogućiti bolje uslove za rad" kazao je dekan prof. dr. Ekrem Čolakhodžić.

Univerzitet je zadržao ulogu nosioca društvenog razvoja Grada Mostara i Hercegovine, a kampus je bio i ostaje mjesto okupljanja mladih, mjesto sportskih takmičenja i usvajanja novih znanja i vještina.

Prorektor za međunarodnu i međuuniverzitetsku saradnju prof. dr. Rijad Novaković istakao je Strategiju razvoja Univerziteta, koja predviđa unaprijeđenje infrastrukture, te razvoj kapaciteta i potencijala. Dio strategije je i Sportska dvorana "Sport i zdravlje". "Rekonstrukcijom dvorane smo poboljšali uslove nastavnog procesa, te stvorili mjesto na kojem studenti mogu provoditi slobodno vrijeme i organizovati sportske manifestacije. Moram i ovom prilikom zahvaliti donatorima i prijateljima koji su podržali projekat" rekao je prorektor prof. dr. Rijad Novaković. Naredni projekat je izgradnja sportskih terena i pratećih objekata u centralnom dijelu kampusa Univerziteta. Grad Mostar je obezbijedio početna sredstva u iznosu od 600 hiljada KM.

"Raduje uspješna saradnja sa vlastima na svim nivoima, koje prepoznaju važnost ulaganju u sportsku infrastrukturu, a od koje će benefite imati i sportisti i sportski kolektivi u gradu" dodao je prof. dr. Rijad Novaković.

Program otvaranja je zaključen posjetom dvorani i keteringom.



SVEČANA SJEDNICA SENATA

By IROUNMO

Svečana sjednica Senata Univerziteta „Džemal Bijedić“ u Mostaru održana je u sali Centra za kulturu Mostar. Svečanoj sjednici Senata su pored menadžmenta Univerziteta, dekana i voditelja univerzitetskih studija prisustvovali i rektori javnih univerziteta u Bosni i Hercegovini, kao i brojne zvanice i gosti. Na sjednici Senata je upriličena dodjela plaketa za profesore koji su na Univerzitetu u protekloj godini stekli zvanje redovnog profesora, kao iskaz poštovanja prema uloženom trudu i predanosti u svom dugogodišnjem radu na Univerzitetu „Džemal Bijedić“ u Mostaru. Dodijeljene su i zahvalnice Univerziteta za izuzetan doprinos u razvoju Univerziteta „Džemal Bijedić“ u Mostaru, te afirmaciji ugleda Univerziteta u zemlji i inostranstvu, kao i rektorove nagrade najboljim studentima Univerziteta „Džemal Bijedić“ u Mostaru.

Prema riječima rektorice Univerziteta „Džemal Bijedić“ u Mostaru prof. dr. Alene Huseinbegović, ovakve manifestacije su prilika da se sumiraju rezultati u prethodnoj akademskoj godini i da se najave planovi za budućnosti.



Rektorica je podsjetila i na ulaganje u infrastrukturu Univerziteta, prije svega na novootvoreni moderno opremljen Studentski dom Antalija u sklopu kojeg je otvorena i studentska ambulanta s primarnom zdravstvenom zaštitom. Također, na Nastavničkom fakultetu otvorena je sportska dvorana, a u planu je izgradnja sportskih terena unutar kampusa Univerziteta, te aktivnosti na rekonstrukciji tzv. zajedničke zgrade koju koristi više fakulteta, a koja predstavlja svojevrsan simbol Univerziteta iz ratnog i postratnog razvoja Univerziteta „Džemal Bijedić“ u Mostaru.

Prisutnim se obratila i rektorica Univerziteta u Tuzli i predsjedavajuća Rektorske konferencije Bosne i Hercegovine prof. dr. Nermina Hadžigrahić, kao i ministar obrazovanja, nauke, kulture i sporta Hercegovačko-neretvanskog kantona prof. dr. Adnan Velagić.

Na svečanoj sjednici Senata dodijeljeno je počasno zvanje profesor emeritus *prof. dr. Seadu Pašiću*, bivšem rektoru Univerziteta.

Dobitnici plaketa za profesore koji su na Univerzitetu u protekloj godini stekli zvanje redovnog profesora su: prof. dr. Jasmina Aliman; prof. dr. Svetlana Hadžić; prof. dr. Alma Leto; prof. dr. Žana Džubur; prof. dr. Armin Hadrović; prof. dr. Amra Jašarbegović; prof. dr. Rebeka Kotlo.

Dobitnici zahvalnice Univerziteta za izuzetan doprinos u razvoju Univerziteta "Džemal Bijedić" u Mostaru, te afirmaciji ugleda Univerziteta u zemlji i inostranstvu su: prof. dr. Suad Špago; prof. dr. Dragi Tiro; prof. dr. Denis Mušić; prof. dr. Amra Mahmutagić; prof. dr. Snežana Bilbija; prof. dr. Redžo Čaušević; mag. iur. Zoran Kazazić; dipl. bibliotekarka Jasminka Trešnjo.

U ime dobitnika plaketa, prisutnim se obratila prof. dr. Alma Leto.



PROMOCIJA DOKTORA NAUKA

By IROUNMO

Svečanom ceremonijom u amfiteatru Fakulteta humanističkih nauka upriličena je promocija doktora nauka Univerziteta „Džemal Bijedić“ u Mostaru.

Rektorica Univerziteta „Džemal Bijedić“ u Mostaru prof. dr. Alena Huseinbegović promovisala je na čast doktora nauka 5 kandidata doktorskih studija na Univerzitetu „Džemal Bijedić“ u Mostaru.

Damir Špago promovisan je na čast doktora nauka iz naučnog područja: Tehničke nauke, naučnog polja: Mašinstvo, naučne grane: Procesno-energetsko mašinstvo.

Dženan Vukotić promovisan je na čast doktora nauka iz naučnog područja: Biotehničke nauke, polje: Poljoprivreda (agronomija), grana: Ekologija i zaštita okoliša.

Emir Hodžić promovisan je na čast doktora nauka iz naučnog područja: Tehničke nauke, polje: Građevinarstvo, grana: Nosive konstrukcije.

Nedim Badžak promovisan je na čast doktora nauka iz naučnog područja: Biotehničke nauke, polje: Poljoprivreda (agronomija), grana: Voćarstvo.

Stjepan Skoko promovisan je na čast doktora nauka iz naučnog područja: Društvene nauke, polje: Kineziologija, grana: Kineziologija sporta i rekreacije.

U okviru svečane promocije doktora nauka obratila se rektorica Univerziteta prof. dr. Alena Huseinbegović, prorektorica za naučno-nastavna pitanja prof. dr. Azra Špago, kao i mentori koji su predstavili biografije kandidata, ranije stečena akademska zvanja, izvještaj sa odbrane doktorske disertacije, te izvještaj o doprinosu kandidata naučno-istraživačkom radu.



SVEČANA PROMOCIJA I DODJELA DIPLOMA

By IROUNMO

Svečanom promocijom i dodjelom diploma u Sportskoj dvorani Sjeverni logor završen je program obilježavanja 47. godišnjice Univerziteta „Džemal Bijedić“ u Mostaru. Na svečanoj ceremoniji uručene su diplome za 493 diplomanta koji su završili studij na Univerzitetu „Džemal Bijedić“ u Mostaru i to 367 diplomanata na I ciklusu studija i 126 diplomanata na II ciklusu studija. Pored toga, promovisano je i 5 doktora nauka na Univerzitetu „Džemal Bijedić“ u Mostaru.

U svečanoj atmosferi prije početka dodjele diploma, studentima se obratila rektorica Univerziteta prof. dr. Alena Huseinbegović.

Diplomantima su se obratili i ministar obrazovanja, nauke, kulture i sporta Hercegovačko-neretvanskog kantona prof. dr. Adnan Velagić, te predsjednik Unije studenata Kenan Begović.

Nakon obraćanja, dekani i voditelji univerzitetskih studija su diplomantima uručili diplome.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
LEJLA REPEŠA
HUSEIN MARIĆ

